



UMURYANGO W'ABIBUMBYE

Urwego Mpuzamahanga Rwashyiriweho Gukora Imirimo y'Insigarira y'Inkiko Mpanabyaha

Urwego Mpuzamahanga Rwashyiriweho Gukora Imirimo y'Insigarira y'Inkiko Mpanabyaha ("IRMCT") rwashyizweho n'Inama Ishinzwe Amahoro ku Isi y'Umuryango w'Abibumbye ku itariki ya 22 Ukuboza 2010 kugira ngo Urukiko Mpanabyaha Mpuzamahanga Rwashyiriweho u Rwanda (TPIR) n'Urukiko Mpanabyaha Mpuzamahanga Rwashyiriweho icyahozze ari Yugosilaviya (TPIY) nizimara kurangiza manda yazo ruzazisimbure ku byerekeranye n'ububasha, imirimo y'ingenzi, uburenganzira n'inshingano zari zifite.

IFISHE Y'AMAKURU KU RUBANZA

Kugeza ubu, abantu umunani barezwe na TPIR kubera uruhare rwabo muri jenocide yakorewe mu Rwanda mu mwaka wa 1994 ntibarafatwa. Hateganyijwe ko IRMCT izabururisha abaregwa batatu bakurikira: Augustin Bizimana, Félicien Kabuga na Protais Mpiranya. Abandi batanu ari bo Fulgence Kayishema, Charles Sikubwabo, Aloys Ndimbati, Ryandikayo na Phénéas Munyarugarama, imanza zabo zoherejwe mu Rwanda. Ladislav Ntaganzwa, na we washakishwaga kandi urubanza rwe rukaba rwaherejwe mu Rwanda, yafatiwe muri Kongo ku itariki ya 9 Ukuboza 2015.

MICT-12-23

USHAKISHWA - FULGENCE KAYISHEMA



Fulgence Kayishema yari umugenzacyaha muri Komine ya Kivumu muri Perefegitura ya Kibuye, Rwanda, mu gihe ibyaha bivugwa mu Nyandiko y'ibirego byakorwaga.

Umwaka yavutsemo
n'aho yavukiye

1961, Komine ya Kivumu, Perefegitura ya Kibuye, Rwanda

Inyandiko y'ibirego

Inyandiko y'ibirego igenderwaho yatanze ku itariki ya 5 Nyakanga 2001

Aho urubanza rugeze

Arashakishwa kuva ku itariki ya 5 Nyakanga 2001

AMAKURU Y'IBANZE KU RUBANZA

INYANDIKO Y'IBIREGO

Fulgence Kayishema yarezwe muri TPIR icyaha cya jenocide, kuba icyitso cy'abakoze jenocide, ubwumvikane bugamije gukora jenocide n'itsembatsemba nk'icyaha cyibasiye inyokomuntu byakorewe muri Komine ya Kivumu, Perefegitura ya Kibuye, mu Rwanda hagati y'itariki ya 6 n'ya 20 Mata 1994; muri icyo gihe akaba yari umugenzacyaha muri ako gace.

Mu Nyandiko y'ibirego havugwa ko Kayishema ashinjwa kwica Abatutsi cyangwa kubateza ububabare buzahaza umubiri cyangwa mu mutwe cyangwa, ibyo byaramuka bitamuhanye, kuba icyitso cy'ababikoze, ku itariki ya 6 n'ya 20 Mata 1994 cyangwa hagati y'ayo matariki, muri Komine ya Kivumu, muri Perefegitura ya Kibuye, agamije kubarimbura bese cyangwa igice cyabo, bazira ubwoko bwabo. Mu Nyandiko y'ibirego havugwa kandi ko Kayishema, hamwe n'abandi bantu, bumvikanye kugira ngo bakore jenocide ku itariki ya 6 Mata n'ya 20 Mata 1994 cyangwa hagati y'ayo matariki, muri Komine ya Kivumu, Perefegitura ya Kibuye, bica abantu bo mu bwoko bw'Abatutsi cyangwa babateza ububabare buzahaza umubiri cyangwa mu mutwe bagamije kurimbura abo bantu bese cyangwa igice cyabo.

Mu Nyandiko y'ibirego havugwa kandi ko, ku itariki ya 15 Mata 1994 cyangwa hafi yayo, Kayishema yategetse cyangwa yacuze umugambi, yashyigikiye kandi agashishikariza isenywa rya Kiriziya ya Nyange, muri Komine ya Kivumu, yarimo Abatutsi barenga 2000 babuze uko basohokamo bagapfiramo. Mu Nyandiko y'ibirego havugwa ko, iyo kiriziya imaze gusenywa, abenshi mu



Batutsi bo muri Komine Kivumu bishwe, ku buryo muri Nyakanga 1994, nta muntu uzwiho kuba Umututsi wari ukibarizwa muri iyo komine.

Mu Nyandiko y'ibirego, ashinjwa ibyaha bivugwa mu birego bikurikira:

Ikirego kimwe cya Jenocide (Ikirego cya 1)

Ikirego kimwe cyo Kuba icyitso cy'abakoze jenocide (Ikirego cya 2)

Ikirego kimwe cy'Ubwumvikane bugamije gukora jenocide (Ikirego cya 3)

Ikirego kimwe cy'Ibyaha byibasiye inyokomuntu

- Itsembatsemba (Ikirego cya 4)

KWIMURIRA URUBANZA MU RWANDA

Ku itariki ya 22 Gashyantare 2012, Urugereko rwa TPIR rusuzuma icyifuzo gisaba kohereza urubanza ahandi rwategetse ko urubanza rwa Fulgence Kayishema rwohererwa muri Repubulika y'u Rwanda.

Ku itariki ya 7 Gicurasi 2014, umucamanza umwe rukumbi, Vagn Joensen, yasohoye urwandiko rwo gufata Kayishema n'itegeko ryo kumwimura bisaba ibihugu byose bigize Umuryango w'Abibumye kumushakisha, kumufata no kumwoherereza Ubushinjacyaha Bukuru bwa Repubulika y'u Rwanda.

Nk'uko biteganywa mu Cyemezo cya 1966 (2010) cy'Inama Ishinzwe Amahoro ku Isi y'Umuryango w'Abibumye, ibihugu byose bifite inshingano yo gufatanya na IRMCT mu gushakisha abaregwa bagishakishwa, kubafata, kubafunga, kubimura no kubashyikiriza inkiko zigomba kubaburanisha.

Ukeneye amakuru arambuye kurushaho wasura urubuga rwa interinete rwa IRMCT www.irmct.org.
Ibibazo by'itangazamakuru byoherezwa kuri imeyiri mict-press@un.org.